



REPUBLIKA E SHQIPËRISË  
AUTORITETI I KONKURENCËS  
KOMISIONI I KONKURENCËS

VENDIM

Nr. 687, Datë 06.04.2020

**“Mbi autorizimin e përqendrimit të realizuar nëpërmjet krijimit të një ndërmarrje të përbashkët, me funksione të plota (Joint Venture) nga shoqëritë Dr.Ing. H.c.F.Porsche Aktiengesellschaft, MHP Management und IT Beratung GmbH dhe Mynih Ruckversicherungs-Gesellschaft”**

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 06.04.2020, shqyrtoi çështjen me:

**Objekti:** Autorizimi i përqendrimit të realizuar nëpërmjet krijimit të një ndërmarrje të përbashkët, me funksione të plota (Joint Venture) nga shoqëritë Dr.Ing. H.c.F.Porsche Aktiengesellschaft, MHP Management und IT Beratung GmbH dhe Mynih Ruckversicherungs-Gesellschaft.

**Baza Ligjore:** Ligji Nr. 9121, datë 28.07.2003 “Për Mbrojtjen e Konkurrencës”, i ndryshuar, nenet 2, 10-12, neni 24, germa d, dhe nenet 53-64. Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit”, dhe formulari i njoftimit të përqendrimit.

**Komisioni i Konkurrencës**, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet krijimit të një ndërmarrje të përbashkët, me funksione të plota (Joint Venture) nga shoqëritë Dr.Ing. H.c.F.Porsche Aktiengesellschaft, MHP Management und IT Beratung GmbH dhe Mynih Ruckversicherungs-Gesellschaft.

**VËREN SE:**

**Transaksioni dhe përqendrimi**

Pranë Autoritetit të Konkurrencës, është depozituar njoftimi lidhur me krijimin e një ndërmarrje të përbashkët, me funksione të plota (Joint Venture) nga shoqëritë Dr.Ing. H.c.F.Porsche

Aktiengesellschaft, MHP Management und IT Beratung GmbH dhe Mynih Ruckversicherungs-Gesellschaft.

**Dr.Ing. H.c.F.Porsche Aktiengesellschaft**, është një shoqëri aksionere, e themeluar në përputhje me legjislacionin gjerman. Porsche operon në prodhimin, zhvillimin dhe shitjen kryesisht të makinave sportive dhe automjeteve për qëllime tregtare, si dhe ofron shërbime financiare për automjetet, duke përfshirë marketimin e shërbimeve të konektivitetit, nëpërmjet markës ndihmëse MOIA.

**MHP Management** është një filial i zotëruar nga Porsche, një shoqëri konsultimi me seli në Ludwigsburg, Gjermani, e specializuar në shërbimet e IT dhe konsulencës në sektorët e automjeteve dhe prodhimit.

Porsche është pjesë e Grupit Volkswagen, i kontrolluar në mënyrë indirekte nga Volkswagen Aktiengesellschaft, shoqëria mëmë e Grupit VW.

Gjate vitit 2019, VW Group ka patur në zotërim në Shqipëri 3 filiale: *Porsche Leasing SHPK*, me objekt aktiviteti; veprimtari e qirasë financiare, agjent në sigurime; *Porsche Mobility SHPK*, me objekt aktiviteti, çdo formë e aktivitetit/veprimtarisë së qirasë operacionale siç parashikohet nga dhe në përputhje me dispozitat e Kodit Civil të Republikës së Shqipërisë siç mund të ndryshohet herë pas here dhe çdo veprimtari tjetër në lidhje me të dhe *Porsche Albania SHPK*, me objekt aktiviteti, shitje me shumicë dhe pakicë të automjeteve të të gjitha llojeve, pjesëve dhe aksesorëve të tyre, kryerje e riparimeve të të gjitha llojeve të automjeteve, përfshirë montimin e automjeteve të përfunduara, modifikim i automjeteve dhe prodhim i pjesëve dhe aksesorëve, etj.

**Mynih Ruckversicherungs-Gesellschaft** (Munich Re) është një shoqëri risigurimi, e themeluar në përputhje me legjislacionin gjerman. Munich Re ka për objekt shërbimet e sigurimit, duke mbuluar të gjithë zinxhirin e vlerës të risigurive, sigurimeve parësore dhe zgjidhjet e riskut të sigurimeve.

Munich Re nuk ka filiale të rregjistruara në Shqipëri dhe as nuk e ushtron aktivitetin në Republikën e Shqipërisë.

**Joint Venture** do të jetë një shoqëri e krijuar sipas legjislacionit gjerman dhe mendohet që Emri i Shoqërisë të jetë “Flex Factory” me sloganin (jo pjesë përbërëse e emrit): “Digital Factory Performance”, me objekt aktiviteti zhvillimin, tregtimin dhe shpërndarjen e produkteve, konsulencës dhe shërbimeve, në veçanti teknologjia e prodhimit, softueri dhe teknologjia e informacionit, administrimi i rreziqeve, strukturimi financiar dhe orkestrimi i zgjidhjeve, të gjitha në lidhje me modele fleksibël dixhitale të prodhimit, me përjashtim të transaksioneve të shërbimeve bankare dhe financiare, në përputhje me dispozitat e Ligjit Bankar.

### **Vlerësimi i përqendrimit**

Më datë 20 dhjetor 2019 është nënshkruar dokumenti i “Marrëveshjes së Joint Venture (Projekti MPM)”, ndërmjet shoqërive Dr.Ing. H.c.F.Porsche Aktiengesellschaft, MHP Management und IT Beratung GmbH nga njëra anë dhe Mynih Ruckversicherungs-Gesellschaft nga ana tjetër, të cilat kanë rënë dakort që të krijojnë një ndërmarrje të përbashkët (joint venture) të krijuar rishtas.

Palët pranojnë të themelojnë një shoqëri me sipërmarrje të përbashkët ku shoqëritë Dr.Ing. H.c.F.Porsche Aktiengesellschaft, MHP Management und IT Beratung GmbH do të kenë në pronësi 50% të aksioneve dhe Mynih Ruckversicherungs-Gesellschaft do të ketë në pronësi 50% të aksioneve në joint venture.

Transaksioni i propozuar konsiston në krijimin e një shoqërie të përbashkët (joint venture) me funksione të plota duke plotësuar kriteret e nenit 10 të Ligjit 9121/2003 “Për mbrojtjen e Konkurrencës”, i ndryshuar. Referuar pasqyrave financiare të palëve në marrëveshje, transaksioni plotëson edhe kriteret e përcaktuara në 12 të ligjit nr. 9121, datë 28.07.2003 “Për Mbrojtjen e Konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Sipas nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar dhe Udhëzimit Nr.76, datë 07.04.2008 “Për përcaktimin e tregut përkatës”, si dhe duke marrë në konsideratë natyrën e transaksionin dhe praktikën më të mira të Komisionit Evropian në çështje të ngjashme, tregu përkatës i produktit është lënë i hapur dhe përkatës gjeografik do të konsiderohet territori i Republikës së Shqipërisë.

Përqendrimi nuk do të prekë tregun shqiptar pasi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar.

#### **PËR KËTO ARSYE:**

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

#### **VENDOSI:**

1. Të autorizojë përqendrimin e realizuar nëpërmjet krijimit të një ndërmarrje të përbashkët, me funksione të plota (Joint Venture) nga shoqëritë Dr.Ing. H.c.F.Porsche Aktiengesellschaft, MHP Management und IT Beratung GmbH dhe Mynih Ruckversicherungs-Gesellschaft.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

#### **KOMISIONI I KONKURRENCËS**